

Damain deficit per il manaschi d'energia

Concern d'energia Repower

DA GION NUTEGN STGIER / ANR

■ **Il martgà d'energia saja er il 2016 stà pretensius. Quai ha ditg ier Kurt Bobst, il directur dal concern d'energia grischun Repower. La svieuta è sa reducida sin 1,7 milliardas francs, persuerter è il deficit considerablmain pli pitschen che anc l'onn precedent.**

La Repower è in dals impurtants manaschis da produziun d'energia en Svizra e staziunà è quel en 16 lieus en tut las regiuns da noss pajais. La sedia principala dal concern d'energia grischun è a Poschiavo. Filialas ha il travagl lura er en l'Italia ed en Germania. En tut porscha la Repower a 580 persunas (30 emprendists) in post da lavur e tutga uschia tar in dals gronds patrums en noss chantun. Directur da la Repower è dapi nov onns Kurt Bobst e president dal cussegl d'amministrasiun è dapi il 2016 cun Pierin Vincenz, l'antieriur parsura da la Banca Raiffeisen, in Sursilvan.

Bunamain 50 000 clients

Las instabilitads politics e las spustadas sin l'entir martgà d'energia internaziunal cun ina gronda concorrenza da l'enegria da charvun e da gas hajan er procurà tar la Repower per volatilitad e nervusadad l'onn passà, ha menziunà Bobst. Betg mo ils pretschs bass d'energia sajan stads ina pulita sfida per il manaschi, mabain er il curs da valutas euro/franc svizzer, ha punctuà il directur dal concern d'energia grischun. Sco che la nova scheffa da finanzas da la Repower, Brigitte Krappf, ha accentuà haja la Repower da preschent vers 50 000 clients. Tranter quels sa chattan er numerusas



Kurt Bobst, il directur dal concern d'energia grischun Repower.

FOTO G. N. STGIER

vischnancas e firmas da l'Engiadina, da la Surselva e lura da las Vals dals sid, sco il Puschlav. L'onn passà ha il manaschi

d'energia investà passa 11 milliuns per il meglierament da la reit dal current e la purschida da quel. Ultra da quai ha la

realisaziun da l'ovra idraulica Morteratsch custà a la Repower diesch milliuns francs.

Il Grischun ha da nov 22% da las aczias

L'acziun da salvament da la Repower cun in auzament dal chapital d'acziun ha purtà al concern d'energia 171 milliuns francs. Qua tras è il chapital agen s'augmentà sin da nov 763 milliuns francs e la quota dal chapital agen giascha ussa tar 44,8%. La Repower ha agiuntà l'acziunariat cun dus partenaris, las Ovras d'energia dal chantun Turgovia cun 28% e la UBS Clean Energia cun 19%. Il chantun Grischun è da nov participà al concern cun 22% e l'Axpo Holding SA cun 13%. Persunas privatas han 18% da las aczias.

Il pli tard a partir dal 2019

L'onn passà ha il concern d'energia Repower fatg ina svieuta dad 1,7 milliardas francs, ditg auter 8% damain che anc l'onn 2015. Cun quella cifra ha il manaschi fatg in deficit da 13 milliuns francs. L'onn avant aveva la Repower anc fatg ina perdita da 136 milliuns francs. L'onn da gestiun pli positiv 2016 è be stà pussaivel da far grazia a l'auzament da las aczias e lura grazia a la vendita d'intgins objects en l'exteriur ed er en Svizra. L'ebet, il gudogn avant avoir pajà las impostas ed ils tschains, giascha en il quint annual 2016 tar 22 milliuns francs e l'onn precedent era quella cifra anc tar 69 milliuns francs. Per vinavant meglierar las cifras vul la Repower restar er en il futur activa cun promover autras energias, cunzunt energias regenerablas ed augmentar la purschida en quella chaussa. Sco che Bobst ha ditg quinta el ch'il martgà d'energia sa revegnia in pau pir a partir dal 2019 e fin alura dovri blera pazienza e perseveranza per tegnair sur l'aua il manaschi e las cifras.